



*Iesus touche & benit les petits enfans : & est interrogé d'un ieune homme  
comment il pourra auoir la vie eternelle.*



N presenta à Iesus-Christ des petits enfans afin qu'il les touchast ; mais les Disciples reprenoient ceux qui les offroient , & Iesus leur dist , laissez venir les petits enfans à moy , car à tels est le Royaume de Dieu. Je vous dis en verité , que quiconque ne recevra le Royaume de Dieu , comme vn petit enfant , il n'y entrera point. Iesus donc mit les mains sur eux , & les benit. Et voicy venir vn Quidam qui s'agenouïlla deuant luy , & luy dist : Bon Maistre , que feray-ie afin que ie possede la vie eternelle ? Il luy dit , Pourquoi m'appelle-tu bon ? il n'y a nul bon que Dieu. Si tu veux entrer en la vie eternelle , garde les Commandemens. Et il luy dist , Quels ? Iesus les luy declara tous. Et enfin luy dist , Ayme ton prochain comme toy-mesme. Et le ieune homme luy dist , l'ay gardé toutes ces choses dès ma ieunesse , Que me faut-il encore ? Et Iesus luy dist , Si tu veux estre parfait , va & vends tout ce que tu as , & le donne aux pauvres , & tu auras vn thresor au Ciel. Lors le ieune homme s'en alla tout triste , car il auoit beaucoup de biens. Puis Iesus montra à ses Disciples comme il est tres-difficile qu'un riche entre au Royaume des Cieux : neantmoins que tout est facile à Dieu.

*S. Matthieu Chap. 18. & 19. S. Marc Chap. 10. S. Luc Chap. 18.*